

Eröffnungsansprache am 06. Mai 2025 zur neuen Legislatur 2025/2029

Gschätzti Frau Landamme Sandra Kolly, gschetzti Regierig, liebi Rotskolleginne und Kollege, wärti Medieverträterinne und -Verträter und Gest im Saal und im Livestream.

I begrüesse euch härzlech zum Start i die nöii Legislatur 2025/2029. Was für ne wunderschöne, würdige Start hei mer grad dörfe erläbe, es Erläbnis für üs aui und eis für die Ching und Lehrpersone vo Bettle, strahlendi Chinderauge mit stouzem Gsichtusdruck, öppis wo eim s Läbe lang in Erinnerig bliibt. Und es hett guet tönt, hani der Idruck. Morgerot, Abendglühn, Nebelflor und wilder Sturm, so heisst im Vertraue uf Gott i de 4 Strophe vo üsem Psalm.

I ha i dene erste 4 Mönat scho a ganz mäng Alass dörfe goh und dört tolli Lüüt i ganz verschiedene Funktione und Ufgabe chönnee kennelehre, siges zum Bispüu d Schütze mit ganz vüu sportleche Erfoug, d Fүүrwehr mit ihrne verantwortigsvoue Ufgabe, d Fischer mit vüu Härz fürs Wohlbefinde vo ihrne Tier im Wasser (aui Fisch hei übrigens e latinische Name), d Wägmacher wo für d Sicherheit uf üsne Strosse Sorge oder d Samariter, wo ir Basis läbesrettendi Massnahme ergrife. I ha bi aune Aläss festgstöut, dass me mit vüu Härzbluet und nach bestem Wüsse und Gwüsse d Ufgabe wohrnimmt und me versuecht, nit stoh z bliibe sondern sich täglech z

verbessere. Dodrby bini scho i mängem Egge und Fläckli vo üsem Kanton gsi und ha mit Stouz festgstöut, wie schön üse wiitverzweigt Kanton isch. Der Kantonsrot und d Regierig, auso mir aui do inne, hei e grossi Verantwortig wohnznäh gägeüber au dene Lüüt, der Bevöukerig und der Natur und de Regione vom Kanton Soledurn. I empfehle aune Kantonsrötinne und Kantonsröt, wenn immer mögliche a Anläss teilznäh, me schetzt d Awäseheit sehr.

Wenn mir der Blick i d Wäut use richte, so bereitet üs d Situation i ganz vüne Länder und Regione, die internationali Lag generell Sorge. Es hett vüu Krisehärd, Chriegszueständ und schwierigi, unberächebari Entwicklige. Wie gohts wiiter? Weli Entscheidige chönnte entspannend würke? Wie isch üses Land betroffe vo dene Entwicklige? Wie üse Kanton? Das si Froge, wo mir üs witerhin wärde stöue und mir chöi nume hoffe, dass es insgesamt i ne positivi Richtig goht.

Was chunnt i dere Legislatur do im Rot uf üs zue? D Arbeit wird üs bestimmt nit usgoh. Es wird Gschäft us aune Beriiche vo triple bottom line z berote gäh. D Wirtschaft, d Gsöuschaft und d Natur si und bliibe thematisch facetteriich i üsem Ufgabeberiich, das gseht me scho, wenn me e Blick uf d Gschäft vo dere Session wirft. De düe mer debattiere und entscheide. Wie göh mer dodrby vor?

I möchte bi dere Frog e Blick zrugg ufe vergangene Sunntig wärfe. I ha dörfe am 128. Soledurner Kantonale Schwingfest teilnäh (natürlech nume aus Zueschauer). Die

vorgesehni Festasproch isch mer leider verwehrt bliebe, der Festakt isch nämlech wägem Duurräge abgseit worde. Aber d Schwinger heis dürezoge, si hei ruehig, taktisch und fair ihri Kämpf ustreit und entwäder der Gägner miteme ideale Zug ufe Rügge gleit oder sich miteme «gstöute» trennt. Nachem Kampf gitt me sich d Hand und aui respektiere enand. Dä traditionell Schwingsport cha ou üs ir Politik es Vorbüud si. Do im Kantonsrot «kämpfe» mir ou um Ergebnis, um Resultat. Aber nit mit Chraft, sondern mit Worte. Das cha und darf durchus intensiv si, schliesslech wett me überzüge und si Meinig düresetze, es sötti aber immer mitem nötig Respäkt vorem politische Gägenüber passiere. Wärtschetzig, zuelose und sachlech debattiere, das si Tugende, wo mir wichtig si. I wünsche mir, dass mir üs do dra haute. So und nit mit unnötigem Gschrei wetti das mit euch zäme apacke. Dir aui sit gwäuht worde, um euch für üse Kanton izsetze, dodrzue gratulieri euch! Damit dir das erfougriich chöit prestiere, bruchet dir ou es guet funktionierends Umfäud i Familie und Bruef. I hoffe, dass das aune guet glingt und fröie mi druf, das jetz positiv und produktiv azpacke. Mir si im Hier und Jetzt, gstaute mir zäme s Morn. Löh mer los! Danke.